

**9,916 warga emas terima suntikan vaksin dos pertama setakat ini - Rina Astro Awani  
24 April 2021**

SUNGAI PETANI: Seramai 9,916 warga emas di seluruh negara telah menerima suntikan vaksin dos pertama menerusi Program Imunisasi COVID-19 Kebangsaan fasa kedua setakat ini.

Menteri Pembangunan Wanita, Keluarga dan Masyarakat Datuk Seri Rina Mohd Harun berkata hasil maklum balas diterima pihaknya mendapati mereka yang sudah disuntik vaksin itu dilaporkan berada dalam keadaan baik.

"Alhamdulillah, kita doakan mereka terus sihat dan tiada mudarat yang berlaku. Banyak cerita kadang-kadang yang buat mereka gusar tetapi Alhamdulillah, selepas disuntik semua dalam keadaan baik," katanya.

Beliau berkata demikian kepada pemberita selepas menyampaikan bantuan kewangan pengoperasian tahunan Pusat Aktiviti Warga Emas (PAWE) Zon Utara 2021 di sini hari ini.

Sebelum ini, dalam laporan media Rina dipetik sebagai berkata seramai 36,000 warga emas dan orang kurang upaya (OKU) dijadualkan menerima suntikan vaksin itu pada fasa kedua dan daripada jumlah itu, seramai 25,000 penerima terdiri daripada warga emas.

Mengulas lanjut, Rina menyeru lebih ramai lagi warga emas mendaftarkan diri untuk menerima vaksin itu sama ada melalui aplikasi MySejahtera, pusat kesihatan daerah atau sukarelawan kementeriannya.

Beliau juga berkata dianggarkan antara 8,000 hingga 10,000 warga emas yang berada di institusi seperti rumah orang tua akan menerima suntikan vaksin itu selepas ini.

Mengulas bantuan kewangan itu, Rina berkata kementeriannya melalui Jabatan Kebajikan Masyarakat menyalurkan peruntukan berjumlah RM600,000 kepada 12 PAWE di Kedah dan RM150,000 untuk tiga PAWE di Perlis.

-- BERNAMA

**© 2021 Astro AWANI Network Sdn. Bhd. (535275-D) All Rights Reserved.**

Source: <https://www.astroawani.com/berita-malaysia/9916-warga-emas-terima-suntikan-vaksin-dos-pertama-setakat-ini-rina-294911>